

15) ԲՃԼ. Վ. ԱՐԾՐՈՒՆԻ. Վարակիչ հիւանդութիւնները եւ նրանց բոյներ, պատկերադարդ. (Բժշկի զրուցներ № 3), Քիֆլիս, 1902 թ. զինն է 15 կ.

Կարելի է ասել որ շատ քիչերն են մեզանում կարողանում ժողովրդի հետ այնպէս պարզ, այնպէս հետաքրքիր ձևով խօսել գիտական հարցերի մասին, ինչպէս յարգելի հեղինակը, որ ընտրում է իր «Զրուցները» համար միշտ ամենակարեւոր հարցեր և առանց կողմնակի շեղումների, առանց աւելորդ շատախօսութիւնների կենտրոնացնում է ընթերցողի ուշադրութիւնը բուն առարկայի վրայ:

Ներկայ գրքոյկի մէջ նա աշխատել է ժողովրդականացնել վարակման գաղափարը: Աւելի պարզ և ամփոփ առաջաբան, վարակիչ հիւանդութիւնները հասկանալու համար, դժուար է երեւակայել:

Գաղափար տալու համար գրքի մատչելիութեան և բազմակողմանի բովանդակութեան մասին՝ մենք առաջ կը բերենք բոլոր գլուխների վերնագիրները.

Վարակիչ հիւանդութիւնները ինչպէս են սկսւում ու տարածւում.—Վարակիչ հիւանդութիւնների պատճառը.—Ինչից են բաղկացած միկրօբները.—Ո՞րտեղ են ապրում բակտերիաները.—Բակտերիաների կեանքը.—Ի՞նչպէս են բաղմանում բակտերիաները.—Բակտերիաների կատարած հրաշքները.—Վնասակար կամ հիւանդաբեր բակտերիաները.—Ի՞նչպէս են մոռնում մեր մէջ այդ սարսափելի թշնամիները և հիւանդացնում մեզ.—Ի՞նչն է ոչնչացնում բակտերիաներին.—Ի՞նչ է դառնում մանրէիկը, երբ ներս է մտնում մեր թոքերը, ստամոքսը կամ վերքերի մէջ.—Ի՞նչպէս են բակտերիաները հիւանդացնում ու մահացնում մարդկանց.—Ի՞նչպէս պէտք է կուռել վարակման դէմ.—Ի՞նչ է անում կառավարութիւնը վարակիչ հիւանդութիւնների դէմ.—Ի՞նչ պէտք է անենք, երբ հիւանդութիւնը տուն է ընկել.—Ի՞նչ պէտք է անել, եթէ հիւանդանոց չկայ.—Ի՞նչ է ախտահանութիւնը և ինչպէս պէտք է ախտահանել հիւանդի սենեակը և միջի իրեղէնները.—Ի՞նչպէս պէտք է խնամել հիւանդին:

Ցանկալի է որ, մանաւանդ մեր գիւղերում, ամենալայն տարածւում ստանայ այս գրքոյկը: Ժողովրդական խաւերին մօտ կանգնած ամեն մի հասկացող մարդ պէտք է յանձնարարի այս գրքոյկի ընթերցումը:

Լ. Ս.